

I NIHNA PHUR CHHUAK RAWH



CHÂNGVAWN: “A ni, chumi avâng tak chuan taihmâk rêng rêng chhuahin, in rinnaah chuan thatna telh ula, in thatnaah chuan hriatna telh ula, in hriatnaah chuan insûmna telh ula, in insûmnaah chuan chhelna telh ula, in chhelnaah chuan Pathian ngaihsakna telh ula, in Pathian ngaihsaknaah chuan ûnate hmangaihna telh ula, in ûnate hmangaihnaah chuan hmangaihna telh rawh u,” (2 *Petera* 1:5–7).

SABBATH CHAWHNÛ

MAY 20

Chhiar tûrte: Rome 5:3–5; 6:11; 1 Korin 15:12–57; Efesi 2:8; Hebrai 10:38; 2 *Petera* 1:1–15.

THUTHLUNG Thar chungchânga thil mak tak pakhat chu hmun chêp tak chhûnga thutak a “beng muk” thei êm êm mai hi a ni. Entîr nân, tân kêra kan zir tûr 2 *Petera* 1:1–14 hi lo en ila. Hêng châng 14-ahte hian *Petera* chuan rinna avâng felna chungchâng min zirtîr a. Isua hnêna inpete nuna Pathian thiltihtheihnain hna a thawh dân te pawh sawiin, thudik ropui tak, “Pathian nungchang tâwmpuitute” kan lo nih theih thu leh khawvêl châkna leh chhiatna lak aţanga kan zalên theih thu pawh a sawi bawk (2 *Petera* 1:4).

Dik tak chuan, *Petera* hian Kristiante nun dân tûra mâwite chu min hrilh a ni mai lo va, a inkhaidiat chhoh dân

pawh min kawhhmuh nghâl bawk. Pakhat hian a hma chiaha mi chu a rawn zui a, chu chu a dangin a rawn zui ve leh zêl a, chutiang chuan a pawimawh ber a thlen hma loh chuan a inzui chho zêl dâwn a ni.

Kristaa awm tih leh kan tûn hma sualte lak atanga “tlen fai tawh” nih awmzia dik tak pawh a ziaak a (2 *Petera* 1:9). Chumi hnu chuan chhandam nih inhriatna chungchâng te, LALPA chatuan rama kan luh ve theihna leh chatuan nunna tiam kan thu te pawh a sawi bawk (2 *Petera* 1:11).

A tâwp berah chuan, thupui pawimawh tak-mitthite awm dân (state of dead) pawh tâwi tê-in a sawi a. Hêng châng sawm leh pali lekah hian thutak pawimawh leh ril tak tak kan hmu tihna a nih chu.

SUNDAY

MAY 21

Rinna hlu tak

2 Petera 1:1–4 chhiar la. Isua Kristaa pêk kan nih thil Peteran a sawi chu eng nge ni? Chumi awmzia chu, heti laia khawngaihna a sawi hi engtiang taka tak nge a nih le?

Petera hian he lekhathawn hi “rinna hlu tak kan chan ang chang vete” lo chhiar atâna a ziah a nih thu a sawi phawt a (2 *Petera* 1:1). “Hlu tak” tia an lehlin Grik thumal hi “hlu dân intluk” tih emaw, “duhsak dân inang reng” tih emaw pawha lehlin theih a ni. A lekhathawn chhiartute chuan he rinna hlu tak hi an “chang” tawh niin a sawi a; chumi awmzia chu an hlauh chhuah emaw, an phu ve rêng emaw ni lovin, a dawna an dawn zâwk a ni a, Pathian thilthlâwnpêk a ni. Paula pawhin heti hian a lo sawi a: “Rinna avânga khawngaiha chhandam in ni si a; nangmahni thawh chhuah a ni lo va, Pathian thilpêk a ni” tiin (*Efesi* 2:8). A hlu dân emna chhan chu rinna lovin Pathian lawm zâwnng mi nih rual a nih loh vâng a ni a (*Hebrai* 11:6). He rinna avâng hian thutiam ropui tak takte chu kan chang thei bawk a ni.

Petera hian Pathian a nihna anga Isua thiltihtheihna chuan nunna leh Pathian ngaihsakna lam kawngah chuan thil engkim min pêk thu hi uar takin a sawi a (2 Petera 1:3). Pathian thiltihtheihna avâng chauha nung leh thianghlimna nei thei kan ni a. Tin, he thiltihtheihna hi ama ropuina leh thatna zâra min kotu Pathian chanchin hriatna avânga pêk kan ni bawk (2 Petera 1:3; Johana 17:3 pawh en la).

Pathian hmangaih tûra koh kan ni a; mahse amah pawh kan hriat loh Pathian chu engtin nge kan hmangaih theih ang? Pathian chu Isua Krista zârah te, Pathian Thu (Bible) kaltlang te, Pathian siam khawvêl aţang te, leh rinna leh thuâwih taka kan nun avâng tein kan hre thei a. Tin, kan chung a khawngaihna a lantîr thin avâng pawhin amah chu kan hre thei bawk.

Tichuan, âwih mai harsa khawpa mak thil pakhat a sawi leh bawk a: chu chu eng dang ni lovin “thutiam ropui leh hlu takte chu pêk kan nih thu hi a ni a, chu thutiamah chuan “Pathian nungchang ţawmpuitute kan lo nih tâk thu pawh hi a tel a ni (2 Petera 1:4). Mihringte hi a tîr takah chuan Pathian anpuia siam kan ni a; chu kan nihna chu nasa taka tihhmêlhem leh tihhniam a ni tawh a. Kan lo pian thar chiah hian Isuaah nun thar kan lo nei a, ani chuan keimahni-ah hian Pathian anna chu din thar leh a nih theih nân hna a thawk ta thin a. Mahse chu inthlâk danglamna chu lo thleng se kan duh a nih chuan keimahni pawh hian khawvêl chhiatna leh châkna kan tlânsan a ngai ve a ni.

Rinna pakhat mah nei lo ta la i nun kha engtiang tak nge a nih ang? I chhanna chuan rinna hi thilthlâwnpêk hlu tak a nihzia hrethiam thei tûrin engtin nge a ţanpui che? _____

Kristianten neih an châk ber tûr - hmangaihna

2 Petera 1:5–7; Rome 5:3–5; Jakoba 1:3, 4; leh Galatia 5:22, 23 te hi chhiar la. Hêng châng hrang hrangte an sawi tân vek thu chu eng nge ni?

Hmânlai mi fingte khân nun dân mâwi leh tha nia an hriatte chu an ziak chhuak thîn a. Chutianga an ziah chhuahte chu “nun dân mawi leh thate ziahna bu” tia sawiin, Thuthlung Tharah pawh hian kan hmu nual (*Rome 5:3–5; Jakoba 1:3, 4; Galatia 5:22, 23*). Mi fingten nun dân tha leh mâwi nia an ziah chhuah thenkhat chu Petera ziahte nên hi chuan inang lo tak tak ni hlawm tho mah se, Petera lehkhathawn lo chhiartute khân hetiang nun dân tha ziah chhuahna bu hi an chhiar ve thîn tho chuan a rinawm. Peteran nun dân tha leh mâwite a ziah hian, pâwng ziah chhuah ngawt lovin, a indawt dân fel takin a ziak a ni tih lo hria la, pakhat chu a hmâa mi chiahah inngat niin chutiang chuan a vâwrtâwp hmangaihna a thlen hmâ chuan a inla lâwn chho zêl a ni.

Hêng nun dân tha Peteran a ziah chhuahte hian a mal tê tê-in pawimawhna an nei theuh hlawm a. Hetiangin:

Rinna: He laiah hi chuan rinna chu eng dang vak ni lovin, Isuan min chhandam tawh a ni tih rinna a ni mai a (*Galatia 3:11; Hebrai 10:38* en la).

Thatna: Thatna (Grik tawng chuan, *arête* an ti a) tih chuan nungchang tha eng pawh a huam vek a, milem be mîte zînga mi fîng awm vete pawh khân an tângaupui nasa ve hle tho. Ni e, rinna chu a pawimawh teh meuh mai a; mahse rinna chuan nun a tidanglam ngei tûr a ni a, chutah chuan thatna chu a lo lang chhuak thei dâwn a ni.

Hriatna: Peteran hriatna a tih hi chu thil hriatna satliah/pângngai ang hi a ni lovin, Isua Krista nêna inlaichînna tha tak kan neihna aţanga lo chhuak hriatna hi a ni zâwk.

Insûmna/mahni inthununna: Kristiante chuan an rilru so phut/let but tûr chu an thunun thei tûr a ni a, a bik takin a lova luata thil tihîrtu tûr phei chu an upbet tlat tûr a ni.

Chhelna: Chhelna tih awmzia chu hrehawm tuar theihna a ni a, fiahna leh tihduhdahna a thlen lai te hian chhel a ngai hle thîn.

Pathian ngaihsakna: Milem be mîte ngaihdânah chuan “pathian ngaihsakna” tia an lehlin thumal hian pathian a awm a ni tih rinna aţanga lo piang nungchang dik tih a kâwk a. Thuthlung Thar lehkhabute-ah pawh hian Pathian dik tak pakhat a awm a ni tih rinna aţanga lo piang chhuak nungchang dik leh ţa tih lam a kâwk ve tho a ni (*1 Timothea 2:2*).

Unaute hmangaihna: Kristiante chu chhûngkhat ang vek an ni a, chuvânġin Pathian ngaihsakna chuan an Kristian-puite nêna inhmangaih tawwna thînlung a neihîr dâwn a ni.

Hmangaihna: Hei hi nun dân ţa dang zawng zawngten a vâwrtâwp an thlenna a ni a. Paula pawh khân, “Chutichuan, hêng pathum - rinna te, beiseina te, hmangaihna te hi a awm reng ang; tin, hêngahte hian a ropui ber chu hmangaihna hi a ni,” tiin a lo sawi ve chiah a ni (*1 Korin 13:13*).

Petera hian hêng nun dân ţa leh mâwite a sawi hma hian, a nei tûrin taihmâk tinrêng chhuah tûr kan nih thu a sawi hmasa phawt a (*2 Petera 1:5*). Eng nge a sawi awmzia ni ang? Pathian ngaihsak leh rinawm taka kan nun theihna tûr hian mihring thiltih eng hian nge ţangkaina nei ve?

THAWHLEHNÎ

MAY 23

I nihna dik tak chu phur chhuak rawh

Kristian kan nihna anga neih ngei tuma kan beih tûr nun dân ţa leh mâwite min hrilh hnu-ah a rah chhuah tûr pawh a sawi a.

2 Petera 1:8–11 chhiar la. Kristiante tâna thil tih tawhte leh Kristiante nun dân tûr hian eng nge inzawmna an neih?

Petera hian a lehkhathawn lo chhiartute chu Isuaa nun thar an lo neih tâk ang chuan nung tûrin a fuih a. Rinna, th̄atna, hriatna, insûmna, chhelna, Pathian ngaihsakna, unaute hmangaihna leh hmangaihna te chu kan ta a ni a, a pung zêl bawk ang (2 Petera 1:8).

Thil buaihlâk tak mai chu, he kan nihna thar ang hian Kristian zawng zawngte kan nung vek tlat lo hi a ni. Mi th̄enkhat chu kan LALPA Isua Krista hriatna lamah hian an chaurau/rah an chhuah lo êm êm mai a (2 Petera 1:8). Chûng mîte chuan an “hmânlai sualte” lak ata tlen fai an ni vek tawh tih pawh an inhre lo (2 Petera 1:9). Tichuan, Petera hian Kristiante chu nun thara nung tawh tûrin a sâwm a. Kristaah chuan ngaihdamna, tlenfaina, leh Pathian nungchang t̄awmpuitute nihna chu an chang tawh a. Chuvâng chuan Pathianin anmahni “a kohna leh a thlanna” tinghet tûrin taihmâk an chhuah tûr a ni (2 Petera 1:10). “Tûn hmâin ka lo ti hrep tawh alâwm” a tih ngawt theih lo va, rah chhuah lo nihna tûra chhuanlam engmah a awm thei lo bawk.

“Rinna neih a pawimawhzia hi kan sawi nasa hle a; mahse thiltih a pawimawhna pawh hi kan sawi uar ve a ngai khawp mai tho. Mi tam tak chuan awlsam taka nun duhna leh mahni kraws pu lova sakhuana kalpui tumna te hmangin an thlarau (rilru) an bum mêk a ni.”—Ellen G. White, *Faith and Works*, p. 50.

Rome 6:11 chhiar la. Heta Paula thil sawi hian 2 Petera 1:8–11-a Peteran a lo ziah hi engtin nge a rawn sawi ve chiah le?

A nihna takah chuan Petera leh Paula te hian “In nih tûr ang tak ni rawh u” tiin min hrilh a. Kristaah chuan thil siam thar, soal lak ațanga silfai tawh, leh Pathian nungchang

ṭâwmpuitute kan ni a. Chuvâng tak chuan nung tûra koh kan nihna ang tak chuan kan nung thei rêng a. Krista ang ni ve tûr kan ni a, chu chu Kristian nih awmzia pawh a ni bawk.

Eng ang taka “Krista ang” nge i nih ngaihtuah la. A eng kawngahte hian nge ṭanlâk deuh i la ngaih le?

NILAINI

MAY 24

Bâwktê chu ṭhiatin

“He bâwktêa ka awm chhûng zawng hian, nangmahni hriatpuiin chawh harh fo che u hi ṭha ka ti a ni; kan LALPA Isua Kristan mi hriatṭir ang khân, ka bâwktê dah bo hun chu a thleng thuai ang tih ka hre si a,” (2 *Petera* 1:13, 14).

Kum 1956 khân Oscar Cullmann-a chuan lehkhabu pakhat, *Immortality of the Soul or Resurrection of the Dead? The Witness of the New Testament* tih chu a ziak a. Chu lehkhabu-ah chuan thawhlehna thurin hi thlarau thi thei lo kan nei a ni tih rinna nêh hi chuan a inrem chiah lo niin a sawi a. Tin, Thuthlung Thar bu pum pui hi mitthite thawhlehna thurina innghat a nih thu pawh a sawi bawk. He a lehkhabu chungchâng hi amah ngeiin heti hian a sawi a: “Ka lehkhabu ziah tawh zîngah chuan hemi bâka mîte lawm hlawh leh do hlawh hi a la awm lo” tiin.

1 Korin 15:12–57 chhiar la. Kan thih hnua thil lo thleng ṭhîn nia Paulan a sawi chu eng nge ni?

Thuthlung Thar lehkhabutên thihna leh thawhlehna chungchâng an ziah dân hi ngun takin an zir hnu-in Thuthlung Thar zirna lama mi thiam tam zâwk daihte chuan Cullmann-a hian a lo sawi dik hle a ni tih an pawm a. Ni e, Thuthlung Thar lehkhabute hian mitthi ruang aṭanga lo chhuak thlarau thi thei loh a awm thu ni lo vin, taksa thawhlehna thu zâwk hi an sawi rêng hlawm a ni.

Entîr nân, Tirkkoh Paula chuan thihna avâng a an hmangaih tak takte lo chên tawhtute chu Isua lo kal leh hunah an lo tho leh dâwn a ni tih hriaa inthlamuan tawn thîn tûrin a chah a (*I Thesalonika 4:16–18*). 1 Korin 15:12–57-ah pawh chipchhiar lehzual zâwkin thawhlehma chungchâng a sawi bawk a. Kristian thurin pawh hi Isua thawhlehma-a innghat a nih thu-a sawi tanin, Isua chu tholeh lo lo ni ta se chuan, amaha rinna kan nghahna zawng zawng hi engmah lo mai a ni dâwn a ni, a ti. Nimahsela, Krista chu muhîl tawhte hmahruaitu, rah hmasa ber ni tûrin thlân aţangin a tholeh si a. Chu Krista thawhlehma avâng chuan amaha awm zawng zawngte chu thlân aţangin an lo tholeh thei ta a ni.

Paula chuan 1 Korin 15:35–50-ah hian tholeh taksa awm dân tûr chu a sawi a. Tûna kan put mêk taksa leh kan dawn tûr taksa thar danglamna sawiin, tûna kan put mêk taksa hi thi ang a; kan thawhle hnu a kan put tûr taksa thar erawh chu thi tawh ngai lo vang.

A khaikhâwm nân ti hian sawi ila: Thuthlung Hlui lehkhabutén thihna chungchâng an sawi rêng rêng hian thlarau thi thei lo kan neih thu ni lovin, taksa thawhlehma nêna inzawm ang zâwkin an zawi zêl a ni.

NINGANI

MAY 25

Thihna hmachhawn laia rinna

2 Petera 1:12–15 chhiar la. Peteran a bâwktê/taksa chu a chhuahsan thuai dâwn nia a sawi hi eng nge a awmzia?

2 Petera 1:12–14 hian he lehkhathawn hi ziah a nih chhan a sawi a. Petera hian a thi dâwn hnai tawh hle niin a hria a, chûvâng chuan he lehkhathawnah hian thuchah hnuhnûng a sawi ta a ni. A thih hun a thleng têt tawh niin a ring a ni tih a lannna chu “he bâwktê-a ka la awm chhûng zawng hian” tih leh “ka bâwktê dah bo hun chu a thleng thuai ang tih ka hre si

a” tih ʔawngkamte a hmang hian a tilang Chiang hlê a (2 *Petera 1:13, 14*). Taksa chu bâwk tê (puan in) angin a sawi a, chu chu a thih hunah a chhuahsan/hlîp dân niin a sawi bawk. Dik tak chuan, a bâwktê dah bo/hlih/chhuahsan tih thu a sawi hian a taksa chungchâng a sawi a ni tih chu tûnlai Bible lehlin hrang hrangten an lehlin dân pawh hian a tichiang a. New Revised Standard Version pawhin, “He taksaa ka awm chhûng zawng hian. . . ka thih hun chu a thlêng ʔêp tawh tih ka hriat avângin. . .” tiin a dah (2 *Petera 1:13, 14*). Petera ʔawngkam hmana a engmah hian Peteran a bâwktê/taksa a hlih/chhuahsan hunah a thlarau chu a hrangin a awm zui dân tih a kâwk miah lo a ni.

2 Petera 1:12–15 hi chhiar nawn leh la. Engtiangin nge Petera hian a thihna lo thleng mai tûr chu a dawnsawn a, chu a lo dawnsawn dân chuan rinna chungchâng eng nge min hrilh?

2 Petera 1:12–15 hian Petera thil sawi hi a urhsûn hle a ni tih tilang a. Hêng thute hi a nunna chu a ʔawp ʔêp tawh a ni tih a hriat avângin a ziak a. A thi dân hnai tawh a ni tih a hriat theihna chhan chu Lalpa Isuan a hriattîr vâng a ni a. Mahse a hlau lo va, pawl a ti lo va, pumpelh pawh a tûm lêm hran lo bawk niin a lang. A vei ber ni zâwk chu a kalsan tûrte ʔha taka an lo awm zêl dân leh dân loh a ni a. An dam chhûng zawng chu “tûnlai thudikah” hian nghet takin ding reng se a duh a, rinawm taka awm zêl tûrin a fuih bawk.

Hetah hian Petera leh LALPA inzawmna takzia leh thûkzia chu kan hmu thei a. Ni e, a thih hun a thleng ʔêp tawh a, a thih dân tûr lah a nuam hran dân lo hle lehngâl (*Johana 21:18* leh Ellen G. White, *Tirhkohte Thiltih*, pp. 537, 538 pawh en la); mahse a ngaihtuahnaa lian ber chu mi dangte ʔatna tûr a la ni reng tho a. Ani chuan a thil sawi angte chu a nunpui Chiang hle a ni.

Engtin nge kan rinna hian thihna râphtlâk tak mai hi hmachhawn thei tûrin min puih? Engtin nge Isuan min tihsak avâng a kan neih beiseina ropui tak hi thihna kan hmachhawn lai te hian kan vawn reng theih ang?

ZIRTÂWPNI

MAY 26

Ngaihtuah zui tûr: Kan hmuh tâk ang khân Petera hian a thi dâwn hnai tawh a ni tih a hria a. A thih dân tûr pawh a hre lâwk vek tawh bawk. A chhan pawh Isua ngei khân, “Tihtak meuhin tihtak meuhin ka hrilh a che, i naupan lai khân i tâiah i inhrêng a, i duhna apiangah i kal thîn a; nimahsela, i upat hunah chuan i kutte i phar ang a, mi dangin an hrênsak ang chia, i duh lohna lamah an kai ang che,” tiin a lo hrilh tawh si a (*Johana 21:18*).

A tâwpna chu eng nge ni ta? “Petera chu, Juda mi a nih bâkah, ram dang mi a nih bawk si avângin vuak tuar tûr leh a hnua khenbeh zui tûrin thiam loh chantîr a ni ta a. Chutianga thihna râphtlâk tak tâwk mai tûr a nih lai chuan an chungthu an rêl laia Isua a phatsan te kha a hre chhuak a, a inthiam lo êm êm mai a ni. Tûn hma zawnga kraws pawm duh ngai miah lo thîn khân chanchin tha atâna a nun hlan chu thil hlimawm takah a lo ngai thei ta a, a LALPA lo phat tawhtu chuan a LALPA thih anga thih ve chu chawimawina ropui takah a ngai ta a ni. Chu a sual avâng chuan a tihtakzetin a inchhîr a; mahse Kristan a ngaidam tawh a ni tih chu a berâmte leh a berâm notê-te châwm tûra mawhpurhna sâng tak a pe khân a tilang. Nimahsela, amah tak hi chu a inngaidam thei ve tlat lo mai a. A hun hnahnûng bera a rilru hrehawmna namên lo tak a tawrh mêk pawh chuan a lungngaihna leh inchhîrna chu tinêp deuh thei bawk si lo. A thil dîl theih hnahnûng ber nia ngaiin amah tihlumtu tûrte hnênah chuan a letling zâwnga kraws-a khenbeh a duh thu a hrilh ta ngawt mai a. A thil dil chu phalsak niin, chutiang chuan tirkoh ropui tak Petera chu a thi ta a ni.”—Ellen G. White, *Tirkhohte Thiltih*, pp. 538.

Mahse hetiang a thihna râphtlâk takin a hmuah mêk lai pawh hian a berâmte thlarau lam dinhmun thatna tûr chu a rilru-a awm lian ber a la ni reng tho a ni.

Sawi ho tûrte:

- ❶ Peteran (Bible-a lekhhabu dang awm vete ziaktute pawhin a ni tho a) Kristiante chu thianghlim taka kan nun a tûl thu a ziahte chu kan lo hre ta a. Chuti ni si, eng vângin nge kan zînga mi tam tak hian Isuaa “kan nihna chu” kan phurh chhuah zawh miah loh thin?
- ❷ In pâwlah khân 2 Petera 1:5–7-a Petera nun dân tha leh mâwi a sawite kha chhiar nawn leh la. A mal tê tê-a in sawi ho hnu-ah he zawhna: Engtin nge hêng nun dân tha leh mâwite hi kan lo neih theih ang a, mi dangte pawhin an neih ve theih nân kan tanpui ang? tih hi in inzâwt theuh dâwn nia.
- ❸ Chanchin tha bu palî-ten Petera mizia leh chanchin an sawi hi thlîr ila, a lekhathawna a thil ziahte hian amaha Kristan thil ropui tak a tih dân chu an lantîr a. Heta tang hian keimahni tân eng ang beiseina leh thlammuanna nge kan chhar chhuah theih?
- ❹ 2 Petera 1:12-ah hian Petera chuan “tûna thudik” (NKJV)/ ”thutak in hnêna awm” (Mizo Bible, OV) tih thu a sawi a. Petera hunlaia “tûna thudik” an tih chu eng nge ni a, keini huna “tûna thudik” chu eng nge ni ve?

BIBLE THILTHLENG MAK

Martin Bengono

SIPAI tan tumin ka insiam a, chhuak mai tûrin ka inpeih tawh a. Ka pân ka kokia vuân chungin ka ken tûrin Bible min hân a.

Ka pâ hnênah chuan, “Pathian chungah ka rinawm zêl ang,” tiin ka tiam a. Chutiang chu a awlsam dâwn lo tih ka hria a, mahse ka tum ka tiruh hlê a.

Sipai tang thar dangte ka zawm vê a, kan inzirna hmun tûr lam panin kêin kan kal a. Kan hotupa chuan kan kal dân chu a khirh theih ang berin a siam a. Bawkvâk chung a lui kân a ngai a, a lo thûk deuh chinah chuan kan rawksai ah rit tak nên kan hleuh a.

Vâukam lehlam kan vah thlen chuan kan bag-te chu a huh hneh hlê a, mahse chawlh leh din thlithlawrna hun pawh pêk kan ni lo. Theihpatâwpa chakin kan kal leh ta ngat ngat a. Camp kan va thlen chuan, taksa sâwizawina nei tûra tih kan ni zui nghâl a. Kan bag huh hniang hnuang kan phelh meuh chuan zanlai a ni hman dêr tawh a ni.

Ka thawmhnâwte ka’n phawrh a. A huh hneh bawka kan sawr dîr tluah tluah mai a ni. Chutah ka pain min pêk Bible kha ka hmû a. Tui huh vâng a zawp chhe vek tûrin ka ngai a, paw ka ti hlê mai. Mahse ka’n khawih chuan a lo ro phak mai a. Makti tak chungin ka la chhuak a, mahse a ro phak mai sî! Ka bag-a thil dang zawng kha chu tui bawlhhlawh khân a chiah huh vek laiin, Bible chu a huh vê lo tlat. Chû chauh ni lo vin, bawlhhlawh pawh a bawlhhlawh vê lo. Pathianin min awmpui ngêi a ni tih chu ka Chiang hlê mai.

Training chu kan ngawrh hlê mai a, chuvâng chuan Pathian chênchilh ka nihziate pawh ka lo hre chang lo rum rum a. Sabbath serh zêl ka duh a, mahse a harsa hlê mai. Kawng min kawhhmuh tûrin Pathian ka ngên a.

Chutah sipai hotûten sipai fâte zirtîrtu tûr an zawng mêk tih ka lo hria a. Ka ngaihven zui nghâl vat a. Vânehthlâk takin zirtîr tûrin min thlang hlahu mai a, tichuan Sabbath nî-ah ka châwl thei dâwn ta a ni.

Sipaia ka ɬan chhûngin, ka rinna thû hi mi dangte hnênah ka hrilh chhâwng ɬîn a. Ka chênpuì pakhat pheì chuan Bible chungchâng min sawipui vê fo va; keimaha nun danglam eng emaw tak a hmuh thûte min hrilh bawk a. Beihpuì thlâknaa inkhâwmpuia ka sâwmna pawmin, chutah chuan a nun chu Isuâ hnênah a hlân vê ta a ni.

Ka sipai ɬanpuì pakhat dang pawh hi Muslim a ni a, a nû leh pête chuan Kristiana a inpêk hi an phal miah lo va. Mahse Adventist sikulah a lût a, Krista pawm tûrin a lo inpeih vê ta mai a. Pathian thû hi ɬahnemngai takin kan tîtî dôn ɬîn a, a hnû deuhah chuan Adventist a lo ni vê ta a ni.

Pathianin min awmpui tih ka hria a. Khatianga kan training-naah khân ka Bible min vênhimsak tawh a; chûbâkah Sabbath serh theih dân kawng min siamsakin, sipaia ɬang chungin mi dangte Amâ hnêna hruai theiin min siam bawk a, ka lâwm hlê a ni.

Martin Bengono-a hi Cameroon ram mîa ni.